

金陵全書

# 金陵全書

甲編·方志類·縣志

## 民國高淳縣志

(三)

(清末民國) 劉春堂 修  
(清末民國) 吳壽寬 纂

南京出版傳媒集團  
南京出版社

圖書在版編目（CIP）數據

宣統高淳縣鄉土志 /（清末民國）吳壽寬編．民國高淳縣志 /（清末民國）劉春堂修；（清末民國）吳壽寬纂．--南京：南京出版社，2013.12

（金陵全書）

ISBN 978-7-5533-0363-5

I. ①宣… ②民… II. ①吳… ②劉… III. ①區（城市）—地方志—南京市—清代 IV. ①K295.31

中國版本圖書館CIP數據核字（2013）第240222號

書 名 【金陵全書】（甲編·方志類·縣志）

宣統高淳縣鄉土志·民國高淳縣志

編 著 者 （清末民國）吳壽寬 編；（清末民國）劉春堂 修  
（清末民國）吳壽寬 纂

出版發行 南京出版傳媒集團

南 京 出 版 社

社址：南京市老虎橋18-1號 郵編：210018

網址：<http://www.njpbs.com> 淘寶網店：<http://njpress.taobao.com>

電子信箱：[njpbs1988@163.com](mailto:njpbs1988@163.com)

聯系電話：025-83283871、83283864（營銷） 025-83283883（編務）

出 版 人 朱同芳

責任編輯 徐 智 吳新婷

裝幀設計 楊曉崗

責任印製 楊福彬

製 版 南京新華豐製版有限公司

印 刷 南京凱德印刷有限公司

開 本 889毫米×1194毫米 1/16

印 張 127.25

版 次 2013年12月第1版

印 次 2013年12月第1次印刷

書 號 ISBN 978-7-5533-0363-5

定 價 3900.00 元（全三冊）

高淳縣志卷二十一

藝文志

夫詠言紀事載筆者多矣行之欲遠甯不由文淳雖江左偏隅  
抒華挾藻代有其人名山國門亦美不勝收焉凡與山川景物  
相比附者已擇其雅馴類爲詮次餘所誤述尚溢篇章皆有關  
於吏治民風上以備輶軒之採下以徵文獻之傳爰旁搜而博  
擷之別彙一編用廣稽覽志藝文

校官碑

漢光和四年

趙勲

蓋漢三百八十有七載口口於口口口銘工著斯金石界誅曰  
溧陽長潘君諱乾字元卓陳國長平人蓋楚太傅潘崇之末緒也  
君稟資南口之禱口天口德之絕操髻髦克敏口學典謨祖訓詩  
易剖演奧義外覽百家衆僞契聖抱不測之謀秉高世之介屈私

趨公卽仕佐上郡位旣重孔武赴著疾惡義形從風征暴執訊獲  
首除曲阿尉畚姦剗猾寇息善歡履孤竹之廉蹈公儀之潔察廉  
除茲初厲清肅賦仁義之風□□□之跡垂化放乎岐周流愛雙  
乎□□親賢寶智進直退慝布政優優令儀令色獄無吁嗟之冤  
野無叩匄之結矜孤頤老表孝貞節重義輕利制戶六百省無正  
繇不責自畢百姓心歡官不失實於是遠人聆聲景附樂受一塵  
旣來安之復役三年推泮宮之教反失俗之禮構修學宮宗懿招  
德旣安日甯干侯用張籩豆用陳發彼有的雅容口閑鐘磬縣矣  
于胥樂焉乃作敘曰翼翼聖慈惠我黎蒸貽我潘君來茲溧陽彬  
文赴武扶弱抑強口刈鯁雄流惡顯忠咨疑元老師賢作朋修學  
童冠琢質繡章實天生德有漢將興尚旦在昔我君存今卽此龜  
艾遂尹三梁永世支百民人所彰子子孫孫俾爾熾昌 丞沛國

銓趙勲字蔓伯左尉河內汲董並字公房右尉豫章南昌程陽字孝遂將作吏名從掾位侯祖戶曹掾楊淮主紀史吳超議曹掾李就門下史吳訓議曹掾桓檜門下史吳翔戶曹史賀口門下史時球光和四年十月己丑朔二十一日己酉造

番陽洪景伯校官碑釋文

單禧

至順癸酉教授濟陰單禧識云長樂陳長方雖嘗碑其所得本末釋文則未之見碑以靈帝光和四年歲在辛酉乃距今凡一千一百五十一年番陽洪景伯先生出字爲之釋謂挈爲契羣爲黎畀爲俾楹爲野賁爲責剗去其刀賢去其貝干侯與豻侯通尚且爲太公周公可謂精審有據其餘不可辨者尚有二十八字今觀首行自三百字以下止斯字凡十有六字比之洪氏作釋文時又皆不可考且如第二行之字之下是禱字禱下闕



一字有天字敏字之上是克字衆字之下是僞字退之下是慝字役之上爲復反之下爲失此之上爲卽皆隱隱可見洪則釋以爲闕文又如旣安且甯則以爲巨甯梅檜則以爲桓檜豈當時誤於墨本而然邪溧陽志謂元貞是人以名乾而附會也按校官碑宋紹興十一年溧陽尉喻仲遠得於固城湖濱詳載溧陽志今碑在溧水聖廟究其從來固城乃漢溧陽縣址則此碑當屬高淳故備錄於此

廣通鎮壩考

韓邦憲

廣通鎮在高淳縣東五十里世所謂五堰者也西有固城石曰丹陽南湖受宣歙金陵姑孰廣德及大江水東連三塔渰長蕩湖荆溪震澤中可三五里頗高阜春秋時吳王闔閭伐楚用伍員計開河以運糧今尚名胥溪河及傍有伍牙山云左氏襄三年楚伐吳

克鳩茲至於衡山哀十五年楚子西子期伐吳至桐汭蓋由此道  
鎮西有固城邑遺址則吳所築以拒楚者也自是河流相通東南  
連兩湖西入大江舟行無阻矣而漢唐來言地理家者遂以爲水  
源本通桑欽水經云中江在丹陽蕪湖縣南東至會稽陽羨入於  
海前漢地理志於丹陽郡蕪湖註云中江出西南至陽羨入海應  
劭顏師古註溧陽云溧水出南湖後漢郡國志蕪湖中江在西孔  
穎達書義疏亦引漢史爲證蓋皆指吳所開者爲禹貢三江故道  
耳後不知何時漸堙景福三年楊行密據宣州孫儒圍之五月不  
解密將臺濛作魯陽五堰拖輕舸饋糧故軍得不困卒破孫儒魯  
陽者銀林分水等五堰壩左右是也壩西北有吳漕水言吳王行  
密所漕也至宋時不廢故高淳水易洩民多墾湖爲田者而蘇常  
湖三州承此下流水患特甚宜興人進士單鶚採錢公輔議著吳



中水利書以爲築五堰使宜歛金陵九陽江之水不入荆溪太湖則蘇常水勢十可殺其七八元祐中蘇軾稱其有水學并其書薦於朝詳具東坡奏議中時用事者方欲興湖田未之行也故永豐等圩官私所築無慮數十萬而固城石臼丹陽三湖之間大抵多圩田矣宣和中待制盧襄奏罷湖田及言開銀林河爲非切務於時田方屬蔡秦韓諸將相家及隸行宮不便塞河卒亦未行也乾道中周益公南歸錄尚謂由鄧埠東壩銀樹可通舟至固城黃池景定建康志及祥符圖經亦謂瀨水西承丹陽湖東入長蕩湖足可徵胥溪河尚通云元伯顏攻臨安三道並進叅政阿剌罕攻破銀樹東壩至護牙山敗宋兵實出此道而河流亦就塞明興高皇帝定鼎金陵以蘇浙糧運自東壩入可避江險洪武二十五年復浚胥溪河建石閘啓閉命曰廣通鎮設巡司稅課司茶引所當是

時湖流易洩湖中復開河一道而尚阻溧水臙脂岡乃命崇山侯鑿山通道引湖水會秦淮河入於江於是蘇浙經東壩直達金陵爲運道云崇山侯者李新濠人也初以建孝陵功封侯焚石而鑿之費油麻不貲石盡赤岡脊本易通有嚴氏者慮損其田以女賂侯故迂其路侯坐極刑死時洪武二十八年也文皇帝遷都於北運道廢永樂元年蘇人吳相五以水之爲蘇常患也引單鍰議奏改築土壩增設官吏歲僉溧陽溧水人夫各四十看守自是宣歙諸水希入震澤矣而壩猶低薄水間漏洩舟行猶能越之正統六年江水泛漲壩大決蘇常潦甚國稅無所出周文襄大集夫匠重築之欽降板榜如有走泄水利渰沒蘇松田禾者壩官吏處斬夫隣充軍十二年張惠等奏復故河道勘行累歲未決成化四年施普奏阻之十二年牟都御史時溧陽令靳彰又議復常民張湍又

奏阻之大抵利塞者壩下諸郡利開者壩上也後車夫與商爭利  
利於陸行正德七年給都御史俞以故例乃令鎮江判齊濟周督  
責增築壩三丈自是水盡壅高淳圩田日就圯矣顧其時懇辭往  
復在開壩未有言減稅者里甲頓耗其半嘉靖初宮保李公充嗣  
奉敕徧詢水利有白子俊者呈復壩河乃令治中周通判呂勘行  
開濬會歲歉止歐夏兩撫臺時程儀鳳再愬之然意在通舟耳三  
十五年倭入寇商旅由壩行者絡繹不絕沿壩居者利其盤剝復  
自壩東十里許更築一壩兩壩相隔湖水絕不復東今壩官及溧  
陽壩夫俱不存矣蓋余他日按輿圖原本山川金陵地脉歷浙閩  
踰東壩至茅蔣勢本聯絡秦漢以前高淳固魚龍之宅也自有胥  
溪河三湖東歸震澤民始得平土居稍稍墾湖田爲業宋時烟火  
最盛今冬春水涸時湖中往往見磚石井塚蓋舊民居云自築壩

以來水勢壅遏田漸淪沒多矣而賦額日增戶口視前僅十之三則惟壩之故嘉靖戊戌覈田至虛懸米八千由今而後田之將圯爲湖者未有紀極也父老言湖底與蘇州譙樓頂相平假令水漲時壩一決蘇常可使爲魚驚當庚申辛酉間大浸稽天涇民紛紛欲掘壩會下壩偶決溧陽宜興而下勢若懷襄有以聞於華亭徐相國者會方令沂入覲召諭重禁之余時在京師韓子曰廣通壩者所以障宣歙金陵姑孰廣德及大江之水使不入太湖者也自前代皆云中江故道近內閣王鏊記太湖以此一源最巨爲蘇常患而伍餘福著三吳水利論亦諳切言之嗟乎以蘇常湖松諸郡所不能當之水而獨一高淳爲之壑其至於洪漲而廢田也決矣而稅又弗損民何以堪之自蘇軾單鍔之言行所以爲壩下諸郡者甚善而未有爲壩上一發明者余覩涇民之日耗且困於虛糧



也作廣通鎮壩考

邑侯伍公去思碑

嘉靖二十年

龔用卿

祭酒  
晉安人

斯民也三代之所以直道而行也夫民之所以直道者蓋以其得於天者有是非之公理而信於人者有是非之公心自古迄今所以流行於宇宙而常伸者其是非之實不可誣也我明興百七十余年而守令之重最爲近古士之爲守令以循吏稱者代有聞焉若今南京光祿少卿鴻山伍公文衡之令高淳也距今十餘載矣而民之思之者猶一日焉夫盡一邑之人衆矣而思之猶一人焉是非其德化入人之深而何以得民心之久若此其至哉吾是以知民心之公理有不可得而誣者矣公之始至也課農桑興學校廣儲蓄積穀萬餘爲荒旱之計而且以德化爲理不任峻刻久之化行境內獄訟清簡事不擾民民不見吏政之及於高淳者如此

則民之所以思之者夫豈偶然之故哉抑亦是非之公心有不容已者與公之少子殤於邑邑之民至今猶俎豆之思公以及其子則民之所以思公者將何如也其邑之人邢引禮瑀等謁予而告曰公之惠吾民者何可忘也願相與刻之石以勸後之人予諾之曰此直道也因次其實俾勒之石以爲後來者式焉公名鑑字文衛閩之晉安人由進士歷戶部郎中任今官

西陡門碑記

嘉靖二十年

無名氏

涇邑有永豐圩者始於有宋口口三年蓋截固城湖之卑下者半周圍計九十餘里因有白鹿行踪之異始事者倣其跡之曲直高下因勢利導築埂成圩初計田七萬餘畝潦蕩灘濱不與焉沿久拋荒往往湮沒莫可究詰至國朝天順六年鄉民目擊心傷苦於水利之不開推重本圩徐貴十吳伯珂等捐金募工將西陡門砌



造比丹陽湖灘地勢交割名爲潮迎進神之象後爲螺螄灘沉溝  
大河水勢洶湧刷洗灘地傾圯大壞滂浸頻災饑饉罔措復於正  
德二年衝破本圩水浸陡門內外崩坍直至嘉靖六年里老徐萼  
吳質等舉呈陶侯備將興利革弊告蒙巡撫歐陽巡按游行縣合  
依擬行又相沿無何至嘉靖十九年幸遇新任甘侯諱惠初下車  
蒞政首以此爲要務誨民修築若何而爲盡善若何而爲未善協  
力監砌陡門乃成語其向則坐向辰戌語其地則風氣攸鍾臨於  
前者而有天設之險培於後者而有地維之固否則徒日紛紛而  
弊焉而已西陡門之名原設有二壩此其壩之上者出入水利兩  
無不宜遇水而不苦於水災遇旱而不苦於旱傷後實計田十萬  
八千畝於是而知此一西陡門之關係誠莫大焉甘侯爲國爲民  
之意可盡述哉然則利害所關可弗慮弗圖而不知所警戒豫備

耶因記以爲後來者勸云

高淳事宜

隆慶三年

韓邦憲

鄧侯以給諫來令吾邑且匝歲鏟故蠹拯民瘼弗自暇逸一日以書來湖南草堂曰高淳利弊願有聞也余謝不敏因僭陳四議皆民情之重大者侯且次第舉行之舍弟邦本進曰吾淳自廣通壩築廢田數萬民懵莫白於上滋久且安之戶口日凋耗矣甚哉乎虛賦之爲累也馬場田先君子蓋嘗言之謂宜代備用馬價屢以干諸令無能喻者曩歲丈田法疎矣豪家恣爲脫灑猾胥操其盈縮大爲民病論地方不論人戶旨哉經界定法也里甲故徵銀在平米內吏之無良役民無少減是兩費矣識治者以弗若聽民自役爲便第令遵歐公故典夫馬外毫無派民則何病焉四議者淳之要政也親友抄錄弗給盡刻之且淳分設以來七十有七載文

獻無稽焉錢穀原委自積書莫能曉諸篇雖隨事錯出然歷年沿革典制大都在是存之以備故籍不亦可乎余無以應爰版之家塾

丁亥水異紀事

黃可文

萬歷十四年冬十月雷震梅花苔蕾盡出溫無積雪飛霧颺雪花凝粧於樹久之明年爲十五年春正月二十日小雨林間搖曳作金戈聲枝葉扶疎如瓊玉樹成冰也嘉靖中水曾見民忘之以爲稔兆二月晴三月雨四月五月晴江潮不至民更憂旱祈雨有錯置祈晴牌者縣官過怒欲加笞之愚民曰官裏無憂越今三日大水船入市矣二十八日始雨民慶沾足明日大雨河魚上壅至三十日六月一日雨二日稍晴午復大雨三日四日連雨先後凡八日萬壑交流山陵倒瀉平原瀾漫濫溢包懷魁壘陂陀襄平若一